

SALOMORE GAE

SALOMORE GAE i mumumbianj â mumutenj gae. Erâ i wemo wiacte hefuakicne i mi fua tanigkekac â mi mana-hâmongopenenj. Mâc gae wiac izi manjaunj ee mumbianjkekac i ine fua tanigkekac. Gae i njic mocjahazi mi hefuawec, erâ gae i gae mocjaha wâc aricne, i gae wiac 25 me 30 nguc qâturekicne tinac ekac.

Njic gâcne jage gae irec zinguc muengopienj: Gae i Israe njic jage Aigita mârenkonec waharâ juwefuhapie Anutuzi manjaunj â hone maing ejarewec irec manasuhuc hefuakicne. Â njic gâcne jage zinguc muengopienj: Aricne, i Jesu â kikefungfâc-ticne jage manjaunj eec eengopienj irec sâsâc ekac, erâ irec erâ Miti Rangao râekicne fokac. Njic gâcne jage ine zinguc muengopienj wâc: I gae jâmbânj aricne, i sâsâc wiac moc gae-ticnehec. Wiac keczinguc irec sâsâc: Njokac naru moc e mangticne lama sonjag moctao râeme domawec. Ehamé Salomo e naru ere ecneme mume ngonânj-ticne eocte erao jowa rambinj. Mâc naru eki ine Salomore moc mi ecnewecte qatara sanankewec. Nguc ekume Salomozi mocwâc bârisieme hae-ticnao rarâ lama sonjag hâcne njowe-ticne rowec.

Erâ gae irec fungne nguc mi mecne fokac. Gae i njic njokac socqâri manj narenj garenj, me manj rârâe me manjaunj eec ehuc njowe ngonânj erâ juningte manasungopienj jagenj erâ hefuakicne. Wemocte? Zinguc mananaj: Anutu e bâbâfua-nânjeczi njic njokac bâfuac-jofarâ zinguc jasawec: "Qârichec ehuc fua sawec erâ mârenj nefusucmahuc ruckenzepienj." E nguc muhuc njic njokac jahe jambunj-jofaweczzi njowe ngonânj nânjâc manzi zâzâfic ehuc manjaunj eec enangte manasuweg wâc. Irec manjaunj ee â manj rârâe i Anuturaonec taha bianj moc ekac. Ehamé njic njokac jajahec jahe manzi zâzâfic ee â manj rârâe ee erâ manjaunj eec ehuc Anutu bâbâfua-jekic mutenjenicmu. Nguc mananzepenenj. Eme njic njokac gâcne jage kosa juhuc taha bianj i sipirickerâ juhapie miti mamana nânjâc sifu manjaunte â manj rârâere manapene Anuturaonec taha bianj ekac ezejec. Eme irec hâcne manjaunj â manj rârâe gae wiac ngucne mitio wâc fuame manapene sâckekac.

1 Salomore gae fekiecne zine hâcne.

Njokac njic binj qakicne e Jerusalem haeo fisiwec

² Ei, go masugezi muducnucte enarekac.

Manjaungezi wainj opâ sirickerâ anacne eekac.

³ Rurua wokemanj opâge i âsu bianj-ticnehec,
â zânj binjege i opâ âsu bianj irec sâc,
eme naru jage irec hâcne gore boc ejareekac.

⁴ Jowacnutec gohec mâmâc gasackerâ ranac.

O njicwofunj, go ficgao râecnuzemec,
eme nânj gore bubianj manahuc zeri bari enangmu,
ehuc wainj opâ mumbianjkeengopenenj
i sirickehuc go muac baafec egarenangmu.

Naru jage gore ejareme sâcke-jâmbânjkekac.

- ⁵ O Jerusalemte otâfâc,
no sahac-nane gâpâre-bipieha sifu hawari bian juekopac.
Sahac-nane i Kedaŋic jaŋere qoruc boze igucne,
erâ Salama ŋic jaŋere fofu qoruc irec sâc.
- ⁶ Sahac-nane gâgâpâc irec boc mi hone sâqorecnuniŋ,
zoaŋzi sahac-nane rikeme iguc hâcne eekac.
Hahac qafâc-nane jaŋe aaric mana-narembiŋ,
ehuc waiŋ gie-jenicta soŋaŋ râecnumbiŋte
no nahacne waiŋ gie hone soŋaŋ mi epo.
- ⁷ Joroc bian-nane, go nazac:
Lamafâcge mâreŋ wena râec-jopaekic,
â gunpiticko wena ejaretec fomanaengopien?
No wemocte âgofâcge jaŋere lama guruo
naru qâsoriekicne tinac jupemu?
- ⁸ O ŋokac hawari bian mocjaha,
go mi manakicko ine
lama jaŋere kike hata bâjâperâ razemec,
ehuc lama motecfâcge lama soŋaŋ jaŋere
boze heririŋnao râec-jopazemec.

Ŋic ŋokac biŋe qacjofakicne jahere dâŋ

- ⁹ Joroc bian-nane, no gore manape
Farao keretac-ticnere becâsicfâc jaŋere sâc ekomec.
- ¹⁰ Maucge erickekicknere boc biankekec,
â upegao eri qoqonaŋ furi sâko râekicne fokac.
- ¹¹ Nâŋe eri wiac golzi bagarehuc
ŋonderŋnao siliwazi kubu bakicne i mâmâc râenaŋmu.
- ¹² Ŋicwofuŋ e nânâ nâocte waha ŋehame
eri qoqonaŋ-nanere âsu bianzi sâkene babatarawec.
- ¹³ Joroc bian-nane e hâpo heârŋ enareme
manape zariŋ qitickekicnezi amec-naneo fokac tinac ekac.
- ¹⁴ No ere manape Engedi mâreŋte waiŋ gieonec
zariŋ âsunehec tinac ekac hâcne.
- ¹⁵ O joroc bian-nane,
go sahac hawari bian,
go zâŋe kereŋ bian-nane!
- ¹⁶ O joroc bian-nane,
go sahac hawari bian,
go boc bianne jâmbâŋ ekomec.
Manakic, qinziŋ geunezi fofu-nâhec tinac ekac,
- ¹⁷ â jâmâzâc jâczi ficnâhec tinac ekac
erâ wete beczi wiaczî sâpene â tapane tinac ekac.

- ² Aricne, joroc bian-nane e firindoac zârâ uupicko fuaekac
irec sâc naru janjere nondenjo juekac.
- ³ Joroc bian-nane e woranjâczi jâc omane janjere nondenjo domaekac
irec sâc njic socqâri janjere nondenjo juekac.
- ⁴ E manjaun sâko enarehuc
waij gie-ticnao jowacnu rawec.
- ⁵ Ehuc waij hândânne nareme nâqignepo
â woraj gumecnume nâpe bâgunucnuwec,
no ere boc enare sâqorekac i!
- ⁶ Meqana-ticnezi qizec rongân enarewec
â mefâre-ticnezi hâpocnuwec.
- ⁷ O Jerusalemte otâfâc,
no tiki nonij â kâte bulimakao
jagerao qetickehuc naza sanankepe:
Njone joroc bian-nane kosa mi wiwickenij,
e jahac mana qâqârerâ faharezejec.
- ⁸ Mananij! Joroc bian-nane warekac.
Tikine tikine â facne facne
tara he tara he warekac hâcne.
- ⁹ Joroc bian-nane e tiki nonij igucne,
â kâte bulimakao motecnezi njicne irec sâc.
Honenij, sac râpenao warejec domakac,
ehuc qâqâtâc katanjo zânje fime wefukac.
- ¹⁰ Joroc bian-nane e kecziñuc muhuc nazakac:
"Kogoc bian-nane, go faharerâ warec.
Manakic, mâmâtenj damej i tarakac,
â hoe damej i wâc tarakac jaha.
- ¹² Kâteo jâc wiac mocwâc fie âric engopien
â wipe jaje dân hawari bianne engopien
erâ hapâ jaje jâchândânjo hehefârec ehuc tumanneengopien.
- ¹³ O joroc bian-nane,
go nemuja fârinezi woze qeuc eme
â waiñzi ârickehuc âsu bian fiha
norao warezemec.
- ¹⁴ O kogoc bian-nane, qânâ â mârenj hawecko songkerâ juekic
go fua tanijketec zânje maige honehape
dânjetec maracge manazepac,
go zânje hawarige bianne
â marac fanfan jâmbân jukomec hâcne.
- ¹⁵ Njone puruj jaje nafeo fisirâ suc qeuc
me hândân wiac gâcne nâ sipiric ehapie
honec-joparâ rocjopa-nârenzeplenj."
- ¹⁶ Joroc bian-nane e nore biñe eha
noni wâc ere biñe ekopac,
e lamafâc-ticne sapa biannao râec-jopaekac.
- ¹⁷ O joroc bian-nane,
go hae owâeha nâkumuc zorame norao warezemec.

Go tiki noniŋ â kâte bulimakao motecnezi ŋicne
tiki mârenko juengopien jarene sâc ezemec.

Ŋokac e ŋicbiŋe-ticnere maŋhâhân ecnewec

- 3** No maŋnanezi zâfickeekopac e hâcne
ŋafene ŋafene guŋqâri juhuc basapo,
basahuc mi bâfuapo,
â wiracnepe okacne mi bâtikie-narewec.
- ² Eme no ziŋuc mupo: "No faharerâ hae sâkoo razepac,
ehuc hae hata sâc â hae zonga sâc babasa gie bazepac."
No iŋuc murâ ra basaku mi bâfuapo,
â wiracnepe okacne wâc mi bâtikie-narewec.
- ³ Eme ruc bapa ŋic jare hae sonaŋ juhuc bâfuacnupie
ziŋuc wio-jarepo: "Ŋoŋe maŋnanezi zâfickeekopac
e moc honembien me?"
- ⁴ Erâ no wio-jarerâ jowaruhuc izia
maŋnanezi zâfickeekopac e bâfuapo.
Ehuc mocwâc behecnurâ razacte ro basanaŋkerâ
neŋgoc-nanere ficko jowa rapo,
erâ neŋgoc-nanezi rocnuwec ficmaŋ ira râepo.
- ⁵ O Jerusalemte otâfâc,
no tiki noniŋ â kâte bulimakao
jagerao qetickehuc ŋaza sanaŋkepe:
Ŋoŋe joroc biaŋ-nane kosa mi wiwickenzepien,
e jahac mana qâqârêrâ faharezejec.

Bâbâtumaŋ fuaocte birickerâ warembiŋ

- ⁶ Mâren burocnaonec wemo wiac warekac?
Wiac i honepene âbârâ ŋic jageraonec
wiac âsu biaŋ fuŋne fuŋne
zocko râepene zame hosâc feekac
irec sâc ekac.
- ⁷ Honeniŋ! Ŋicwofuŋ Salomo e kanze-ticnao
reŋkerâ warengopien,
ehame Israe zikanŋic tâpirihec 60 jare
orâŋ bârân ecnehuc zâhec bâni ecneŋgopien.
- ⁸ Jare zika sâqe-jenichec sasawa
erâ zika qaqa saric.
Jare ŋafeo râsi fisipie
jopa jâpec ejareniŋte zikare wiac-jenŋic
baju-fârengopien hâcne.
- ⁹ Ŋicwofuŋ Salomozi mume kanze-ticne
i Lebanon tikionec jâc wiaczî bambiŋ.
- ¹⁰ Ehuc reŋ wiac-ticne i siliwazi bahuc
rorowec-ticne golzi bambiŋ,
erâ neŋe-ticne i Jerusalemte otâfâc
jare qoruc furi sâkozi ba akic embiŋ.

- ¹¹ Zionte otâfâc, ɲɔŋe hæonec waharâ
 ɲicwofuɲ Salomo ofac hecneniɲ.
 E bâbâture damenɲ, ʒeri bubianɲ damenɲ-ticnao
 nengoc-ticnezi eri hendiɲ hecneme huwec
 i herâ warekac hâcne.

ɲic e ɲokac biɲe-ticne mumbianɲkekac

- 4** O âgo bianɲ-nane, go sahac hawarige bianɲe jâmbânɲ,
 ʒâɲe hândânɲe i kuɲkuɲ wipere ʒâɲe iɲucne
 rurufa maɲko ɲehuc fikomec,
 erâ qizec susucge ʒoricne i noniɲ jaɲe Gileade heâɲkonec
 kiwae razic wefuc ehuc wahaengopienɲ irec sâc ekac.
- ² Micsiecgɛ i lama nengocne kanʒanɲ-ɲenɲic bâtâcnepie
 opâ ruarâ wefueɲgopienɲ
 irec sâc qanqanɲ jâmbânɲ ekac.
 Jaɲe motecfâc-ɲenɲic funʒuɲ fâri sasawa
 motec tâmiric moc mi juengopienɲ.
- ³ Bipicge i muc bâbâronɲ irec sâc â memasu bembɛɲ,
 mauc jahecge ɲifec â ɲifec i rurufa magnaɔ
 boʒanɲ iɲucne bâruɲkerâ fokac.
- ⁴ Upege i Dawidire ficsanɲ irec sâc,
 fic ira ʒika ɲic saric jaɲere wiac
 fuɲne fuɲne qetickekicne domakac.
- ⁵ Susu jahecge i tiki noniɲ motec jajahec
 jahe ʒariɲ maɲnao qinʒiɲ nâhuc domakopirec irec sâc.
- ⁶ No hæ'owâeha nâkumuc ʒorame
 ʒariɲ âsu bianɲ â hosâc âsu ririke tikio fepemu.
- ⁷ Joroc bianɲ-nane, go sahac hawari bianɲ jâmbânɲ,
 go sahac fâsâc jukomec hâcne.
- ⁸ O ɲokac biɲe-nane, go Lebanonɲ tiki beherâ warezemec,
 eme nohec mâmâc tiki mârenɲ i beherâ razeperec.
 Go Amana, Seniri â Herimonɲ tiki botâɲkonec biac wahazemec,
 laiɔɲ jaɲere jujuonec â lepad jaɲere tiki mârenɲkonec wahazemec.
- ⁹ O ɲokac biɲe âgo-nane, go maɲ bâsifuc enaretec
 maɲnane gorao fâfârewec,
 go ʒâɲe râqâc honecnutec maɲnane gorao fâfârewec,
 qoqonangere qânâ furi sâc mocjahazi
 maɲnane bâsifuckewec hâcne.
- ¹⁰ O ɲokac biɲe âgo-nane, maɲge norao domame bianɲke-jâmbânɲkekac,
 maɲge nore domame aɲacnukac
 i manape waiɲ opâre aɲacnuekac irec sâc sirickekac,
 â rurua wokemaɲ opâgere âsunezi
 wiac âsu bianɲ gâcne sirickekac wâc.
- ¹¹ O ɲokac biɲe-nane, bipicge i aɲac baɲacne,
 â nameɲ rurumangao baɲac â susu fokac tinac ekac,
 erâ ɲaqigere âsu i Lebanonɲ tikire âsu irec sâc.
- ¹² O ɲokac biɲe âgo-nane,

go zariŋ gie motâc herâ ki bakicne irec sâc,
â opâ zâŋe bâbâzickekicne igucne.

¹³ Go jufu gie igucne,

maŋnao jâc nâkicne â hâmu qoza wiac doma rakac.

¹⁴ Erâ zariŋ wiac âsunehec â wiac nânânezi âsu bian
fugne fugne fua rakac wâc.

¹⁵ Go jufu gie opâ zâŋe fokac

izi nombâŋkonec wefurâ qiqicne raekac irec sâc,
â Lebanonj tikionec opâ sâko wahaekac igucne.

¹⁶ O jowarec, go funkerâ qawarec,

O mula, go iguc jaha qawarec,

ehuc jufu gie-nane fificnepire

âsu bian-ticne ŋeiŋnerâ razejec.

Ehame joroc bian-nanezi jufu gie-ticnao warerâ

jâcfârî aŋac baŋacne nâ bac ezejec.

5

No jufu gie-nane, ŋokac biŋe âgo-nane hâcne erao warekopac,

ehuc zariŋ wiac-nane âsunehec â wiac

nânânezi âsu bian i ro qâzuc ekopac,

erâ baŋac-nane opâne â bitune nâkopac,

â waiŋ opâ â susu-nane i wâc mâmâc nâkopac.

O âgofâc-nane, ŋoŋe nânâ opâ wiac i nâkupie

maŋŋeŋic ŋokac jaŋerao wâc qohotazejec.

Rârâwiŋ juju i busâqocnehec

² No maŋqârî fohuc guŋ ziguc manapo:

Joroc bian-nanezi motâcko heickerâ dân ziguc nazawec:

"Joroc âgo bian-nane,

go maŋgezi bianne zâficnuekicte motâc ronarec.

Maniŋ titikuczi qizec-nane bâŋgumuŋkekac,

â hoe zâmbânzi qizec susuc-nane hembânâŋkekâc."

³ No ŋaqi-nane biac hetarapac,

irec weniguc erâ mocwâc hepe huocmu?

Â kike-nane biac zurepac,

irec weniguc sohoŋ mocwâc âtepemu?

⁴ No iguc muhape joroc bian-nanezi meticne motâcko sicneme

wefume

honerâ hobu-nane taŋtaŋ âeckewec.

⁵ Eme no fahare joroc bian-nane motâc rocnehape

menaneonec wokemaŋ opâ âsu bianzi waharâ motâc mebapane
ruacnewec.

⁶ Ehame joroc bian-nane motâc rocnepe

e mocwâc mi domahuc biac risie rawec.

No iguc honerâ maŋnane gâckewec.

Eme basarâ mi bâfuapo,

â wiracnepe micnaneo wâc mi rowec.

- ⁷ Eme ruc bapa ñic jañe hae soñankehuc juku bâfuacnurâ
zâpâ nuhuc ñaqi-nane sahañe nowac rorâ bawisembiñ.
Haesacte ruc bapa ñic jañe iñuc hâñe enarembiñ.
- ⁸ O Jerusalemte otâfâc, no dân zinguc ñaza-jâmbânkepe mananiñ:
Ñoje joroc biñ-nane bâfuarâ âzâcnenzepeñ:
No ere mâretec enarekac.
- ⁹ O ñokac hawari biñ mocjaha,
go fuñne wenigucte joroc biñgere manatec ñic gâñe jañere
sâc sirickekac?
Go fuñne wenigucte joroc biñgere manatec ñic gâñe jañere sâc
sirickeha giedân keci munârekomec?

Ñokaczi ñicbiñe-ticne mumbiankekac

- ¹⁰ Joroc biñ-nane e zâñe mai-ticne bâric bâricnehuc socsoc eekac,
e ñic taueñne taueñne jañere ñonderko juhame biac zâñitazo.
- ¹¹ Qizec-ticne i gol ematauckekicne tinac
â qizec susuc-ticne i mimiñgen â gâgâpâc, kâec kâecte suhuc
iñucne.
- ¹² Zâñe hândân jahec-ticne i hapâ jajahec jahe opâ ruarâ
sahac-jekic qaqaç taegñe eha opâmecko ñeekopirec irec sâc.
- ¹³ Mauc jahec-ticne jahe mâreñ bureñ bakicnao
zariñ â wiac âsu biñ fuñne fuñne foekac irec sâc,
â bipic-ticne i wâc zariñ âsu biñ iñucne.
- ¹⁴ Meombân jahec-ticne i roñ golzi barâ
fainao qânâ furi sâko birickekiñe irec sâc,
â fâri ombân-ticne i elefançe zungezi ba akic erâ
fainao qânâ furi sâko jaha bohotakicne iñucne.
- ¹⁵ Kike jahec-ticne i qânâ wâtun gol râqâcko râepie hurâ domaekac
irec sâc,
â hawari-ticne i Lebanon tikionec jâmâzâc iñucne.
- ¹⁶ Dâñmarac-ticne i boc añañe jâmbân,
â sahaç hawari-ticne i biñne sasawa.
O Jerusalemte otâfâc,
joroc âgo biñ-nane ere fuñne iñuc hâñe.

6

- O ñokac hawari biñ mocjaha,
joroc biñge e wena rawec?
Joroc biñge e hata wenimoira rawec
i nâzâtec baficguhuc basanzepeñeñ.
- ² Joroc biñ-nane e zariñ gie-ticnao zinenjâc domakacko ira hurâ
rawec,
e ira rac warec ehuc añaç manaocce â zariñ âsu biñ ro qâzuc
eocce iñuc ewec.
- ³ No joroc biñ-nanere biñe, â joroc biñ-nane e nore biñe,
e lamafâc-ticne zariñ ñonderko soñan-jopaekac hâñe.

Ŋic e ŋokac biŋe-ticne mumbianŋkekac

- ⁴ O joroc bian-nane, go Tiriza hae bianne irec sâc jaha,
â Jerusalem hae aŋac baŋacne iŋucne,
ehuc ŋifec ine momori ŋic jaŋere manapene
hâhâwicne eekac irec sâc wâc ekomec.
- ⁵ Ƶâŋe jahecgezi maŋ bâsifuc enarekopirecte
boc mi honecnuzemec.
Qizec susucge zorice i noniŋ jaŋe Gileade heâŋkonec
kiwae razic wefuc ehuc wahaenggopieŋ irec sâc ekac.
- ⁶ Micsiege i lama nengocne jaŋe opâ ruarâ wefuenggopieŋ
irec sâc qaŋqaŋ jâmbâŋ ekac.
Jaŋe motecfâc-jeŋic funzuŋ fâri sasawa,
motec tâmiric moc mi juenggopieŋ.
- ⁷ Mauc jahecge ŋifec â ŋifec i rurufa maŋnao
bojazaŋ iŋucne bâruŋkerâ fokac.
- ⁸ Ŋokac fekiecne 60 â ŋokac mamare 80
erâ naru ŋokac wowosec-jopane tâmiric iŋuc juenggopieŋ.
- ⁹ Ehame ine joroc bian-nane mocjahazi sawa âgo bian-nane jukac,
e nengoc-ticnere otâ mocsâkoazi nengoc roro-ticne araŋ
bacnehuc juekac.
Naru ŋokac gâcne jaŋe e honerâ mu zeri ecneenggopieŋ,
erâ ŋokac fekiecne â ŋokac mamare jaŋe iŋuc jaha ehuc
mumbianŋkeenggopieŋ.
- ¹⁰ "Furic tatamac â mosa zoaŋ erâ bâpiŋ jaŋere
tatamacte sâc jaha tamaekac e mo?"
- ¹¹ No wâneŋko wiac ârinehec fuaekac
i hone aŋac epemurâ kaŋa gięo hupac.
Erâ wâc waiŋzi biac fiekac â bojazaŋzi âri qakac me mâcne
i mâmâc honepemurâ ira hupac hâcne.
- ¹² Eme mamanasu-nanezi ututuŋ jaha jowacnu rarâ
joroc bian-nanezi keretacko ŋewec ira râecnuwec.
- ¹³ O Sulam naru ŋokac,
go foforisietec hone warec egarenaŋ!
- Hâc, ŋoŋe Sulam naru ŋokaczi
gae wowo ŋic jaŋere ŋondeŋko gae wohuc rac warec eha
wemo wiac mo honeniŋmu?

7

- O naru ŋokac fekiecne,
no kike tapegere manape boc bianŋkekac.
Gozi jahecge i qânâ furi sâko irec sâc,
ŋic mamana saric moczi bâfuawec tinac ekac.
- ² Funzuŋge i râqâc oorâŋ iŋucne,
ira waiŋ opâ wiac âsu bianŋhec bâsifuckekicne ŋehuc juekac,
â bururuge i padi sesucne zariŋ âsu bianzi
râreckehuc domakac irec sâc.

- ³ Susu jahecge i noniŋ motecne jajahec jahere sâc,
tiki noniŋ motecne funzuŋ fâri iŋucne hâcne.
- ⁴ Upege i ficsanaŋ elefanŋe zuŋezi bakicne irec sâc,
â zâŋe hândân jahecge i Hesiboŋ haeo
Batarabim sacmotâc ŋifecnao opâ riŋic ŋekac iŋucne,
â sâke tetcge i Lebanonŋe ficzora
Damasko haeopec ŋekac irec sâc.
- ⁵ Qizecge i Karamele tiki iŋucne ferâ ŋekac,
â qizec susucge zorice waha domakac i gâgâpâc jâmbân,
ehame ŋicwofunzi hone râraqârehuc manŋicne gorao qohotaekac.

Ŋic ŋokac bibiŋe jahe bubiaŋ mamananac ekopirec

- ⁶ O joroc biaŋ-nane, naru ŋokac hone aŋacne,
sahac hawari biaŋge kereŋ bareŋe.
- ⁷ Go fâujâc iŋucne ferâ domakomec,
â susu jahecge jahe fâu fârine irec sâc.
- ⁸ No ziŋuc mupo: No fâujâc hahanŋo ferâ fârine rohape
susu jahecgezi waŋ qiti iŋucne ezeŋirec,
â micâsugezi ine woraŋ ââsu irec sâc ezeŋec.
- ⁹ Ehame go arec faio dân nazatec manape
waŋ opâ aŋac zizine nâkâcnepe ne qunqunke tâmiric
biaŋge huekac irec sâc ezeŋec.
- ¹⁰ No joroc biaŋ-nanere biŋe,
e nore mâretec ecnekac hâcne.
- ¹¹ Joroc biaŋ-nane, go warec,
eme juŋu gieo rarâ jâwecjâc fuŋnao guŋ fonac.
- ¹² Hae fureme ine waŋ gieo rarâ
waŋ i âpâu-ticnehec fokac me biac fâuckeŋec,
erâ bojazaŋ wâc âri qakac me mâc fokac i honezepeŋec.
Eme no ira hâcne manzi zâficgupemu.
- ¹³ O joroc biaŋ-nane, ira gâgâsere âsu biaŋ biac fuakac,
erâ jâchândân aŋacne â nânâne fuŋe fuŋe,
raŋqane â qâricne i gore biŋe râe biric efârepo hâcne.

8

- Jai, go hahac-nane fuarâ
nengoc-nanere susu nanzaŋ me!
Go iŋuc etec muzac no ira me ira bâfuacguhuc muducgupe
ŋic jaŋe mi mana sâqore-narenzapiŋ.
- ² Ehame no jowacgurâ nengoc-nanere ficko râecgupe
maŋ râreac eere fuŋe qazu-narenzaŋ.
Ehuc waŋ opâ wiac âsu biaŋhec bâsifuckekicne
i â mandariŋ opâ gare gûmec ezapo.
- ³ Ehame meqanagezi qizec roŋgân-nane ezac,
â mefâregezi hâpocnunzaŋ.
- ⁴ O Jerusalemte otâfâc,
ŋoŋe joroc biaŋ-nane kosa mi wiwickenzepeŋe,
e jahac mana qâqârerâ faharezeŋec.

Manzi zâzâfic i wiac sanagne jâmbân

⁵ Mâreŋ burocnaonec warehuc joroc biaŋ-ticne
erao roweckekac e mo?

No nengocgezi gozi kime rocguwec
woraŋjâc irec fuŋnao wiwicgupo.

⁶ Meo fefe mahec rojuengopien irec sâc
maŋgao â meombâŋgao râecnuzemec.

Manzi zâzâfic irec tâpiri i hâmocte tâpiri

irec sâc sanagne jâmbân ekac,

â zâŋgeruŋzi âgo mi bacnâpoekac

irec sâc jaha mamanaugheczî jaun tâmiric juekac.

Maŋ rârâec ee i wiac fofô sanagne,

wiac moczi moc mi bawa haocmu.

⁷ Rumi sâkozi sâcne mi jowa raocmu

â opâ sâkozi wâc mi qâuruckeocmu.

I ŋic moczi moneŋ mafa wiac sâko-ticnezi

furine baocte mume muzac

ine mu ruruc boc ecnenzapiŋ.

⁸ Nâŋe qonâŋec piticne moc jukac

e susu-ticne kucguŋne ŋekac,

irec ŋic moczi biŋe qacnenanŋte ware mume

qonâŋec e weniguc ecnenanŋmu?

⁹ E qânâsac iŋucne fome

fainao siliwa hendiŋ hecnepene huocmu,

me motâc iŋucne domame

jâmâzâc katapazi foŋkenanŋmu.

¹⁰ No qânâsac iŋucne ehape

susu jahec-nane jahe ficzora-ticne irec sâc ferâ ŋekopirec,

ehame honecnume wamane jukopac tinac ekac.

¹¹ Salomo e Baali-Hamoneŋ mâreŋko waiŋ gie-ticne moc fokac,

i ŋic gâcne jaŋe hotâ baju huc soŋaŋkeniŋte jarewec,

ehuc fârine fuame ro nâc ehuc furine ru sâc

siliwa moneŋ wân tauseŋ râcneniŋte mujarewec.

¹² Nore waiŋ gie i no nahacne biŋe jâmbân,

irec Salomo go monenŋe wân tauseŋ i fogarezo murâ fogarezejec,

â soŋaŋ gie baengopien jaŋere moneŋ 200 fojarezo murâ

fojarezejec wâc.

¹³ O ŋokac biŋe-nane, go jufu gieo juhanŋe

âgofâc-nane jaŋe dânmaracge mananiŋte hazec râeengopien,

irec dân mutec noni maracge manazepac wâc.

¹⁴ O joroc biaŋ-nane, go biac ware hofao fuazemec,

ehuc tiki noniŋ me kâte bulimakao motecnezi ŋicne

jaŋe tikio wiac âsu biaŋ fuaekacko juengopiên jaŋere sâc ezemec.